

28. september 2023

UKA2023/19

Nioqqutissanik eqqussuineq annissuinerlu pillugit Inatsisartut inatsisaata allanngortinnera pillugu Inatsisartut inatsisissaattut siunnersuut

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

Nioqqutissanik eqqussuineq annissuinerlu pillugit Naalakkersuisut inatsisissatut siunnersuutaanut Siumumit ima oqaaseqaateqassaagut.

Siumut isumaqarpoq siunnersuut ataatsimut isigalugu ajunngitsoq, aamma kalaallit kiffaanngissuseqarnerulernissaanut ikorfartueqataasoq.

Taamaattoq Naalakkersuisut siunnersuutaani maluginiarparput, umiarsuakkut timmisartukkullu eqqussuineq assigiinngitsumik nassuiarneqarlunilu inissinneqartoq.

Timmisartunut ilaasut, akitsuusersuisunut isaarissat marluk atortassagaat siunnersuutigineqarpoq, tassaassut aappaluttumik aamma qorsummik nalunaaqutserneqarsimasut. Immiaaqqat, viinnit, imigassat, cigaritsit tupat allallu akitsuusersugassat - akitsuusersorneqartussaannngitsuninngaanniit sipporlugit nassartoqarsimappat – inuup nammineq tamanna isaariaq aappaluttoq atorlugu nalunaarutigissagai takorloorneqarput, ilimagineqarluni nioqqutissat arsaarinnissutigineqartut ikilinerannik tamanna kinguneqassasoq.

Umiarsuakkulli tikisinneqartussat pineqartillugit Naalakkersuisut siunnersuutiminni allatorluinnaq suleriuseqartoqarnissaanik siunnersuuteqarput. Umiarsuakkut tikisitsissagaanni siorngerlugu akuersissummik qinnuteqartoqarsimassaaq, aamma siumoortumik 250 koruunit akilerneqassappat taassumalu qaavatigut akitsuutaasussamut naleqqiullugu 50 procentit akiliutigineqassapput.

Naalakkersuisut tunngavilersuutigaat, taamak suleriuseqarnissap siunertarigaa, niuertarfiit akigititaanut sanilliullugu akikinnerujussuarmik pisiortortalissanngitsoq – unammillertoqalissanngitsoq.

Siumut isumaqarpoq, pineqartoq tassaagaluartoq inuit nioqqutissanik pineqartunik eqqussuinerat, imaanngitsoq nioqqutigineqaaqqittussanik eqqussuinissaq pineqartoq.

Taamaattumik ataatsimiititaliamut siunnersuut ingerlaqqissappat nalilersugassaqartoq Siumut isumaqarpoq. Tassami ilanngullugu takusinnaavarput, Naalakkersuisut siunnersuutaat



malinneqassappat, tamanna aamma allaffissornerulernermik – inunnik
nakkutilliinerulernermik – kinguneqartussaasoq.

Taamak oqaaseqarluta siunnersuut Aningaasaqarnermut Akileraartarnermullu ataatsimiititaliamut
ingerlateqqinneqarnissaa innersuussutigaarput.

Karl Tobiassen
Siumut